



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

KASIH WANITA

TEMA SAMBUTAN HARI WANITA ANTARABANGSA 2023

KUALA LUMPUR, 8 Mac – **KASIH Wanita** dipilih sebagai tema Sambutan Hari Wanita Antarabangsa 2023 menggunakan akronim **K.A.S.I.H** iaitu **kasih sayang, akhlak mulia, sihat, ilmu dan harmoni** untuk meraikan wanita yang sentiasa mencurahkan kasih sayang, mengekalkan akhlak mulia, memastikan diri dan keluarga sihat, sentiasa mempertingkatkan ilmu dan memelihara keharmonian sekeliling. Tema ini dipilih bersempena dengan 22 tahun KPWKM ditubuhkan yang mana KASIH adalah pertautan nilai-nilai murni yang mengukuhkan lagi peranan KPWKM sebagai peneraju utama dalam pembangunan masyarakat ke arah kemakmuran bersama. Tema ini juga sangat tepat dalam merujuk kepada peranan KPWKM untuk memperkasa wanita dan mengurus perdana gender bagi mencapai kesejahteraan bersama. Ini juga adalah selari dengan hasrat Malaysia Madani melalui kesejahteraan rakyat serta keterangkuman sosial.

Majlis Sambutan Hari Wanita Antarabangsa 2023 telah disempurnakan oleh YAB Dato' Seri Anwar bin Ibrahim, Perdana Menteri bertempat di Dewan Perdana FELDA Kuala Lumpur. Dalam ucapannya, YAB Perdana Menteri menegaskan bahawa agenda memperkasa wanita merupakan tanggungjawab bersama semua pihak dan bukan hanya dipikul oleh Kementerian Pembangunan Wanita, Keluarga dan Masyarakat sahaja. Dalam hal ini, YAB Perdana Menteri memuji peranan serta inisiatif yang telah dilaksanakan oleh pelbagai kementerian dan agensi dalam membantu membangun, memperkasa, mengiktiraf kebolehan dan sumbangan wanita dalam pembangunan negara.

Kerajaan juga amat menghargai usaha komuniti yang sentiasa memberikan sokongan kepada program yang dilaksanakan oleh Kerajaan. Pemeraksanaan komuniti adalah selaras dengan konsep Madani bagi pembangunan negara yang makmur dan sejahtera. Kementerian Pembangunan Wanita, Keluarga dan Masyarakat (KPWKM) telah menterjemahkan konsep Madani bukan sahaja melalui KASIH Wanita, malahan juga

melalui KASIH Keluarga dan KASIH Remaja. Di bawah KASIH Wanita, komuniti berperanan untuk melindungi kanak – kanak, membantu mangsa keganasan rumah tangga dan memberi kesedaran mengenai antigangguan seksual. Pengukuhan masyarakat secara inklusif adalah penting untuk kita sama – sama maju dan berdaya saing dalam menghadapi cabaran global. Sebanyak enam (6) inisiatif pemerkasaan Wanita Madani iaitu diumumkan iaitu;

1. i-Sayang

Sebagai menghargai sumbangan isteri, Kerajaan melalui Kumpulan Wang Simpanan Pekerja memperkenalkan i-Sayang, iaitu satu inisiatif yang membolehkan suami untuk memindahkan dua (2) peratus caruman KWSP syer pekerja secara sukarela ke akaun KWSP isteri. Pindahan ini membolehkan para isteri terutamanya yang tidak bekerja, mempunyai simpanan persaraan yang akan menjadi sumber pendapatan pada usia emas mereka kelak.

2. Tabung KASIH Wanita

Peruntukan sebanyak RM1 juta kepada Yayasan Kebajikan Negara bagi mewujudkan Tabung KASIH Wanita bertujuan membantu wanita menerusi tabung ini khususnya wanita yang tidak berkemampuan dalam kategori B40 yang sedang dalam tempoh penceraian dan mengalami masalah kewangan bagi kelangsungan hidup.

3. Garis Panduan Pelaksanaan Program Advokasi Antigangguan Seksual

Garis Panduan Pelaksanaan Program Advokasi Antigangguan Seksual telah dibangunkan bertujuan menjelaskan pelaksanaan program advokasi berkaitan langkah-langkah pencegahan dan menggalakkan kesedaran tentang gangguan seksual di kalangan semua lapisan masyarakat. Garis Panduan ini merangkumi pelan tindakan program advokasi bagi pencegahan gangguan seksual dan pelan tindakan program advokasi bagi kesedaran gangguan seksual. Modul *Training for Trainers* juga telah dibangunkan yang bertujuan melatih lebih ramai individu dalam advokasi antigangguan seksual seterusnya memperluaskan kesedaran masyarakat tentang perkara ini. Garis Panduan ini berkuat kuasa mulai pada hari ini 8 Mac 2023 dan semua pihak adalah bertanggungjawab untuk sama– sama mematuhi Garis Panduan yang telah dibangunkan ini.

4. Konvensyen Wanita Madani

Konvensyen Wanita Madani akan dilaksanakan di bawah KPWKM bagi memastikan suara dan pandangan wanita dapat dicerakinkan sebaik mungkin. Pewujudan platform ini menekankan elemen kepelbagaian, kesaksamaan dan inklusiviti selaras dengan pendekatan memupuk nilai ihsan dan membangunkan masyarakat madani. Inisiatif bersepadu dan kolaboratif menerusi kerjasama daripada pelbagai sektor dan penyertaan aktif semua pihak penting dalam agenda pembangunan negara. Dasar Wanita Negara serta Pelan Tindakan Pembangunan Wanita yang sedang dalam semakan juga akan ditambah baik mengambil kira suara dan pandangan wanita pelbagai peringkat.

5. Perluasan Pembangunan Garis Panduan / Tatacara Yang Mewajibkan Pelantikan 30 Peratus Wanita Sebagai Pembuat Keputusan di Syarikat Berkaitan Kerajaan (GLC), Syarikat Pelaburan Berkaitan Kerajaan (GLIC) dan Syarikat Menteri Kewangan Diperbadankan (MKD).

Turut diadakan pada majlis tersebut ialah penyampaian anugerah KASIH Wanita kategori Bakti, Cekal, Harmoni, Komuniti dan Bangkit) kepada lima (5) wanita yang dipilih atas sumbangan dan usaha yang mereka lakukan bagi membantu memperkasakan wanita.

Hadir sama pada majlis ini antaranya ialah YB Dato' Sri Hajah Nancy Shukri, Menteri Pembangunan Wanita, Keluarga dan Masyarakat, YB Hajah Aiman Athirah binti Sabu, Timbalan Menteri Pembangunan Wanita, Keluarga dan Masyarakat, YBhg Datuk Dr. Maziah Che Yusoff, Ketua Setiausaha KPWKM, Kedutaan dan NGO

###

**UNIT KOMUNIKASI KORPORAT
KEMENTERIAN PEMBANGUNAN WANITA, KELUARGA DAN MASYARAKAT**

8 MAC 2023